

KHI THUNGETNA LE ALIANBEL SIAMPITE

Thungetzia leh thungetna tampi a omna sungpanin, Alianbel Siampi (Pope) te ii adeih penpen leh hoih asak penpen khat in 'Khi thungetna' ahihi. Tua hi-in, khi thungetna tawh kisai athu genna te uh i etciangin, i lungsim sungah kuama gentheih loh lungnopna leh lungkimna hongguan hi.

Pope Pius XII na (St. Pius) in, "Khi thungetna in Lungdamna thubu ii cingtomkim (cing lah cing, tom lah tom, kim lah kim) namun hi" naci hi. Pope John XXIII (Bl. John) in, "Khi thungetna in, ahoih penpen Pasianthu lungngaih kawma thu ngetna ahihi. Banghanghiam cih leh, Christu Topa' mihing hong suahna leh gupkhatna thupha hongpiakna thute in, khi thungetna angentaktakte lungsim sungah siangtak leh kilang takin teenghi," ci hi. (Encyclical, *Grata Recordia* pan lak khat).

"Khi thungetna i cih in, Christu Topa tungah kinga a thungetna ahihi" ci-in, Pope Paul VI in honghilh hi. (Apostolic Exhortation: *Marialis Cultus*, n. 46). Tua banah "Khi thungetna in kadeih penpen leh, kalung kimpennen thungetna ahihi," ci-in, Pope John Paul II in na gelhlai hi. (Apostolic Letter: *Rosarium Virginis Mariae*, n. 2). Khi thungetna in, Christu Topa tungah kinga a thungetna (*Rosarium Virginis Mariae*, n. 1) hi-in, lungdamna thu leh Laisiangtho kigawm na mun zong ahih manin misiangtho te leh Pasion bek muana anei mihoih mipha te in angpom in, khahsuahlo uhhi.

Maria tawh akibangin Topa tawh kigawmkhawmni! Christu Topa tawh nakhempeuh te ah i kibat zawnha'ng (Philippi 2:5) leh Christu Topa pen puanbang silh in (Rom 13:14, Gal 3: 27) i nuntak zawnhang hanciam na in, Christian nuntakna man taktak ahihi. Christu Topa in eite sungah adimtak leh kicing taaktak a, hong om theih ni masiah teng (Gal 4:19) eite itna tawh lamhonglak in, hongmapi dending a om, hehpih na tawh akidim Jesu Nu le eite Nu Maria (John 2:

2-6, 19:26-27) in honghuai, hongkem, hongcing den ahih manin, Khi thungetna in, Nu Maria ii nasepna ahi, atapa le eite pumkhatsuah zawh na'ng ahanciamna ah, nakpi takin tha pia hi. Tua in Khi thungetna ii vangliatna ahihi. Tua hi a, Maria Tonu ii, ei Christian te ading ana sepna in, Pasion tawh hong kigamlasak hi loin, atapa tawh pumkhat hongsuah sakna hangin, Pasion tawh pum khat hongsuak sak ahihi.

Pope John Paul II in khangno te hongvaikhak na ah:

"Kongit khangno te aw, Khikhin a nathunget dinguh, zum ngaihsut khakei un. Haksa sakei un. Lampai kawm, nasep napan naciah kawm, sangpai le ciahkawmin, khikhin a, thu nget ding lau in, zumkei un. Tua banga thungetna in, upna ah hong hangsan sakdinga, itna ah hong citak sakin, lametna ah lungnopna le lungduaitaka ngakzawhna tha hongguan ding hi. "Pasion in septheih loh nei lo hi (Lk 1: 37, 18: 27) cih thu na up namuan zawh taktak nangun, tuabang upna anei Maria i nu kiang zuanin nasin den un!" [from L'Osservatore Romano n. 12 (1785)-19 March 2003].